



MAHOMETES, hoc nomine secundus, Turcarū verò Rex octauus, Amurathi, etiam huius nominis secundo, succedit anno mundi 5411. à Christo nato 1449. Hic regnum à patricidio auspicatur, fratrem paruulum, ne pater solus sepeliretur, opera Mosis interficit. Impiissimus nullum Deum credidit: Mahometem suum, Pseudopphetam sui similem dixit: Prophetas ac Patriarchas risit, ac nugas duxit: huic tametsi impio, fauit aliquando fortuna. Nam magni cognomentum Othomannicæ familiæ quæsiuit. Duo Christianorum imperia Constantinopolitanum & Trapezuntinum subuertit: regna 12. ademit: ducentas vrbes Christianas cepit: Ipse colico dolore correptus, quarto demum die moritur, anno ætatis 58. regni 31. Richer. li. 1. Paul. Iou. Egna. li. 2. Cosm. Mun. li. 4.

BAIAZETES hoc nomine secundus, Mahometis supra dicti filius Ianizarorū opera Turcis imperat anno mūdi 5442. à Christo nato 1480. Hic minorē fratrem Zizimū, quem primores Imperatorē exposcebant, vincit ac fugat: qui à Rhodi præfecto ad Carolū octauum in Galliam mittitur. Porrò Baiazetes Caramanno fuso, quæcunq; is cis & trans Taurum Turcis ademerat, recepit: Valachiam subegit: In Sultanum Aegyptium mouit: Sed is potentior, vtpote qui Mamaluchos, post Caramanni cædem fugitios exceperat, ac Arabum maximas copias ad suam tuitionem alebat, Baiazetem sæpe debilitat, ac profligat: postea Cerauniorum montium accolas subdit. Venetis Methonē, nunc Modonem, Nepanthum, olim Naupactum, & Dyrrachium ademit. Acomathem primogenitum decrepitus Baiazetes absentem in locum suum substituit: Sed, Ianizaris Zelimo suffragantibus, cogitur pater Zelimum pro Acomathe substituere. paulò post imperio deturbatus à filio Zelimo, ab eodem filio veneno necatur, anno regni 30. Vide vt supra.